



Одсјек Кривичне Одбране
Odsjek Krivične Odbrane
CRIMINAL DEFENCE SECTION

DODATNA PRAVILA POSTUPANJA
ZA ADVOKATE ODBRANE KOJI POSTUPAJU PRED
ODJELOM I ZA RATNE ZLOČINE I ODJELOM II ZA ORGANIZOVANI KRIMINAL, PRIVREDNI
KRIMINAL I KORUPCIJU SUDA BOSNE I HERCEGOVINE

SADRŽAJ

DIO I – OPŠTE ODREDBE	3
Glava 1 – Osnovni principi	3
Član 1.1 – Predmet i primjena pravila	3
Član 1.3 – Izmjene i dopune	3
Član 1.4 – Sukob odredaba	3
Član 1.5– Definicije	3
Glava 2 – Odsjek Krivične Odbrane	4
Član 2.1 – Uspostava Odsjeka krivične odbrane	4
Član 2.2 – Nadležnosti	5
Dio II – PRIMANJE I RASPOREĐIVANJE advokata	6
Glava 3 – Stavljanje na listu	6
Član 3.1 – Lista ovlaštenih advokata	6
Član 3.2 – Kvalifikacije advokata	6
Član 3.4 – Posebni prijem	6

Na prijedlog Ureda registrara za Odjel I za ratne zločine i Odjel II za organizovani kriminal, privredni kriminal i korupciju Krivičnog i Apelacionog odjeljenja Suda Bosne i Hercegovine u skladu sa članom 12. stav 5. Zakona o Sudu Bosne i Hercegovine, Sud Bosne i Hercegovine je, na osnovu člana 22. stav 2. tačka b. Zakona o Sudu Bosne i Hercegovine, na općoj sjednici održanoj dana 30. juna 2005. godine usvojio

**DODATNA PRAVILA POSTUPANJA ZA BRANITELJE KOJI POSTUPAJU PRED
ODJELOM I I ODJELOM II KRIVIČNOG ODJELJENJA I ODJELOM I I ODJELOM II
APELACIONOG ODJELJENJA SUDA BOSNE I HERCEGOVINE**

DIO I – OPĆE ODREDBE

GLAVA 1 – OSNOVNI PRINCIPI

ČLAN 1.1 – PREDMET I PRIMJENA PRAVILA

Ovim Pravilima se uspostavlja Odsjek za krivičnu odbranu Ureda registrara i propisuju se način i uslovi za stavljanje na listu advokata kojima je dozvoljeno da postupaju pred Odjelom I za ratne zločine i Odjelom II za organizovani kriminal, privredni kriminal i korupciju Krivičnog i Apelacionog odjeljenja Suda Bosne i Hercegovine, kao i za raspoređivanje advokata koji postupaju kao branitelji neke osumnjičene, optužene ili pritvorene osobe.

ČLAN 1.2 – STUPANJE NA SNAGU

Ova Pravila stupaju na snagu sedam dana od dana usvajanja od strane Opće sjednice Suda i postaju sastavni dio Poslovnika Suda, a primjenjuju se na predmete koji budu primljeni u rad nakon dana stupanja na snagu.

ČLAN 1.3 – IZMJENE I DOPUNE

1. Prijedlozi za izmjene i dopune ovih Pravila podnose se na usvajanje Općoj sjednici Suda. Uz prijedloge za izmjene i dopune potrebno je priložiti obrazloženi prijedlog i sav prateći materijal.
2. Primjena usvojenih izmjena i dopuna Pravila koje je usvojila Opća sjednica Suda ne može ići na štetu prava osumnjičenog ili optuženog u postupku koji je u toku pred Sudom.

ČLAN 1.4 – SUKOB ODREDBA

U slučaju sukoba između pojedinih odredaba ovih Pravila i odredaba sadržanih u bilo kom drugom poslovniku, pravilima ponašanja, pravilima profesionalne etike ili uputstvima, a u pogledu davanja dozvole za rad advokata i raspoređivanja branitelja u postupcima pred Odsjecima I i II, odredbe ovih Pravila imaju prednost.

ČLAN 1.5 – DEFINICIJE

1. U smislu ovih Pravila, osim ako iz sadržaja ne proizilazi drugačije, pojedini izrazi imaju slijedeće značenje:

Pravila	Pravila o radu za branitelje koji postupaju pred Odjelom I za ratne zločine i Odjelom II za organizovani kriminal, privredni
---------	--

	kriminal i korupciju Krivičnog i Apelacionog odjeljenja Suda Bosne i Hercegovine
Sud	Sud Bosne i Hercegovine
Odjeli I i II	Odjel I za ratne zločine i Odjel II za organizovani kriminal, privredni kriminal i korupciju Krivičnog i Apelacionog odjeljenja Suda Bosne i Hercegovine
Ured registrara	Ured registrara za Odjele I i II
Registar	Registar za Odjele I i II
Lista	Lista advokata koji su ovlašteni za postupanje pred Odjelima I i II Suda BiH
Odsjek krivične odbrane	Odsjek krivične odbrane Ureda registrara (OKO)
Ovlašteni advokat	Advokat koji je stavljen na listu advokata ovlaštenih za postupanje pred Sudom u skladu sa ovim Pravilima.
MKSJ	Međunarodni sud za krivično gonjenje lica odgovornih za teška kršenja međunarodnog humanitarnog prava, počinjena na teritoriji bivše Jugoslavije od 1991. godine, uspostavljen rezolucijom 827. Savjeta bezbjednosti od 25. maja 1993. godine;
Advokatske komore:	Advokatska komora Federacije Bosne i Hercegovine i Advokatska komora Republike Srpske
Zakon o Sudu:	Zakon o Sudu Bosne i Hercegovine
ZKP	Zakon o krivičnom postupku Bosne i Hercegovine

2. Izrazi koji nisu definisani ovim Pravilima imaju značenje određeno pojmovima sadržanim u važećim zakonima Bosne i Hercegovine.

GLAVA 2 – ODSJEK KRIVIČNE ODBRANE

ČLAN 2.1 – USPOSTAVA ODSJEKA KRIVIČNE ODBRANE

1. Uspostavlja se Odsjek za krivičnu odbranu Ureda registrara kako bi se pružila pravna pomoć osumnjičenim i optuženim, a taj će odsjek nositi naziv Odsjek krivične odbrane ili OKO.
2. OKO čini direktor Odsjeka, profesionalno te administrativno osoblje angažovano od strane OKO-a u skladu sa internim pravilima Ureda registrara.
3. Registar, uz konsultacije sa predsjednikom Suda, imenuje direktora OKO-a.

ČLAN 2.2 – NADLEŽNOSTI

1. OKO pruža pomoć svakoj osumnjičenoj ili optuženoj osobi protiv koje se vodi istraga ili koje se tereti za djelo iz nadležnosti Suda, odnosno koje je pritvorena u skladu sa ovlastima Suda ili je privedeno radi pojavljivanja pred Sudom.
2. U skladu sa čl. 12. stav 2. Zakona o Sudu BiH, OKO je ovlašten kao nadležno tijelo za izdavanje dozvola za postupanje za Odjele I i II, i ovlašten da priprema i ažurira listu advokata.
3. OKO svoje funkcije između ostalog vrši i na slijedeći način:
 - a. Pomažući zaštitu prava osumnjičenih, optuženih, pritvorenih i drugih osoba;
 - b. Osiguravajući i vodeći zastupanje osumnjičenih, optuženih, pritvorenih i drugih osoba;
 - c. Pomažući da se osigura poštivanje najviših standarda krivično-pravnog sistema;
 - d. Obrađujući zahtjeve za prijem na listu u skladu sa usvojenim kriterijima iz ovih Pravila;
 - e. Vodeći tačnu i ažuriranu listu ovlaštenih advokata;
 - f. Pružajući svim osumnjičenim i optuženim osobama informacije o načinu na koji mogu odabrati branitelja sa liste;
 - g. Pružajući administrativnu i drugu podršku raspoređenim braniteljima;
 - h. Organizujući kurseve edukacije kojima bi se advokatima omogućilo da zadovolje kriterije za upis na listu, uz kontinuirano stručno usavršavanje.
4. Advokati iz OKO-a, koji daju pravne savjete ili zastupaju osumnjičene, pritvorene, optužene ili druge osobe, postupaju u najboljem interesu tih osoba, i nezavisni su od Ureda registrara. Pravni savjeti koje OKO daje osumnjičenim, pritvorenim i ostalim osobama ili bilo kojem advokatu smatraju se povjerljivim.
5. Predsjednik Suda može preispitati svaku odluku direktora OKO-a.

DIO II – PRIMANJE I RASPOREĐIVANJE ADVOKATA

GLAVA 3 – STAVLJANJE NA LISTU

ČLAN 3.1 – LISTA OVLAŠTENIH ADVOKATA

1. OKO objavljuje javni oglas kojim se pozivaju advokati da se prijave za upis na listu.
2. OKO utvrđuje da li postoje propisani uslovi u skladu sa ovim Pravilima, te kandidate koji te uslove zadovolje stavlja na listu.
3. OKO ažurira listu, te tako ažuriranu listu dostavlja predsjedniku Suda.

ČLAN 3.2 – KVALIFIKACIJE ADVOKATA

Da bi bio postavljen na listu, advokat mora ispunjavati svaki od slijedećih uslova:

1. Trenutno i važeće članstvo u jednoj od advokatskih komora;
2. Najmanje sedam godina relevantnog radnog iskustva na pravnim poslovima u svojstvu advokata, sudije ili tužioca kako bi bio imenovan za jedinog ili glavnog branitelja;
3. Da posjeduje poznavanje i stručnost u relevantnim oblastima prava u skladu sa kriterijima objavljenim od strane OKO-a; i
4. Da ima dovoljan broj sati stručne obuke u okviru kontinuiranog procesa stručnog usavršavanja, u skladu sa kriterijima koje objavljuje OKO.

ČLAN 3.3 – PODNOŠENJE PRIJAVA

1. Podnosilac zahtjeva je dužan podnijeti i odgovarajući obrazac za prijavu koji priprema OKO, kao i svu ostalu relevantnu dokumentaciju neophodnu u skladu sa kriterijima iz čl. 3.2(4) ovih Pravila.
2. Svaki advokat kome se odbije zahtjev za stavljanje na listu može predsjedniku Suda izjaviti prigovor na rješenje u roku od petnaest dana od dana prijema obavijesti o takvom rješenju.

ČLAN 3.4 – POSEBNI PRIJEM

1. U skladu sa članom 12. stav 2. Zakona o Sudu, sudije Odjela I i II mogu u bilo kojem trenutku izvršiti poseban prijem advokata koji nisu na listi i odobriti njihovo postupanje odnosno obavljanje prakse pred sudom.
2. Definicija "advokata" iz stava 1. obuhvata, ali nije ograničena na advokate koji imaju važeću dozvolu za obavljanje advokatske prakse, izdatu od strane priznatog udruženja advokata iz strane zemlje ili od državnog organa.

3. Advokati prijave podnose sudiji za prethodni postupak, sudiji za prethodno saslušanje, sudiji, odnosno predsjedniku vijeća, zavisno od faze postupka.
4. Prilikom razmatranja prijave, u skladu sa ovim članom sudija može uzeti u obzir slijedeće faktore:
 - a. Da li je branitelj pokazao specijalizirano poznavanje krivičnog prava, međunarodnog humanitarnog prava, međunarodnih propisa iz oblasti ljudskih prava ili bilo koje druge oblasti prava, s kojima bi u znatnoj mjeri mogao pomoći u toku postupka.
 - b. Ako je advokat već postupao pred MKSJ u predmetu koji je ustupljen Sudu u skladu sa Pravilom 11 *bis* Pravilnika o postupku MKSJ, da li bi ijedan drugi branitelj imao dovoljno vremena na raspolaganju za pripremu odbrane.
 - c. Da li je advokat već podnosio zahtjev za stavljanje na listu koji je odbijen.
 - d. Sve druge faktore od značaja za prava osumnjičenog ili optuženog.
5. Sudija obavještava OKO o svakoj odluci o posebnom prijemu advokata koji nije na listi.
6. OKO vodi i ažurira listu advokata kojima je dozvoljeno posebno postupanje.
7. Advokat je dužan OKO-u dostaviti relevantnu dokumentaciju u skladu sa odredbama člana 3.3. ovih Pravila.

ČLAN 3.5 – SKIDANJE SA LISTE

Advokat koji je stavljen na listu biće skinut sa liste pod slijedećim okolnostima:

- a. Ako zatraži skidanje sa liste, a u tom trenutku nije raspoređen ni na jedan predmet;
- b. Ako više ne zadovoljava kvalifikacije propisane ovim Pravilima; ili
- c. Ako je bio isključen iz postupka u skladu sa odredbama iz člana 42. ZKP, ili je u više navrata bio udaljen iz sudnice ili mu je bilo uskraćeno daljnje zastupanje na glavnom pretresu u smislu člana 242. ZKP.

GLAVA 4 – ODREĐIVANJE BRANITELJA

ČLAN 4.1 – ODABIR BRANITELJA SA LISTE

1. Osumnjičeni, odnosno optuženi može odabrati branitelja sa liste, koji pristaje i na raspolaganju je za raspoređivanje na predmet osumnjičenog odnosno optuženog.
2. Ako osumnjičeni odnosno optuženi predloži branitelja koji nije na listi, OKO uzima kao prioritet u razmatranju zahtjev tog branitelja za postavljanje na listu u skladu sa ovim Pravilima, ili advokat može podnijeti zahtjev za poseban prijem u skladu sa članom 3.4 ovih Pravila.

3. Ukoliko osumnjičeni ili optuženi ne odabere ili ne predloži branitelja po svom izboru, tada, u skladu sa članovima 45. i 46. ZKP-a, sudija za prethodni postupak, sudija za prethodno saslušanje, sudija, odnosno predsjednik vijeća može:
 - a. dodijeliti slobodnog branitelja sa liste; ili
 - b. privremeno dodijeliti slobodnog branitelja sa liste; ili
 - c. privremeno dodijeliti nekog drugog branitelja na period ne duži od trideset dana.

ČLAN 4.2 – ODREĐIVANJE DODATNIH BRANITELJA

1. Ako je više od jednog branitelja potrebno radi odgovarajuće pripreme odbrane, Sud može odrediti dodatne branitelje.
2. Sud može uzeti o ubzir sljedeće kriterije prilikom donošenja odluke o određivanju dodatnih branitelja u konkretnom predmetu:
 - a. Složenost predmeta;
 - b. Broj članova tima optužbe u datom predmetu;
 - c. Količina dokaznog materijala kojeg podnosi optužba;
 - d. Složena činjenična ili pravna pitanja;
 - e. Procijenjena dužina trajanja pretresa;
 - f. Bilo koji drugi faktor relevantan za prava osumnjičenog ili optuženog.
3. U slučaju dodjeljivanja više od jednog branitelja, osumnjičeni ili optuženi se izjašnjava koji od branitelja ima status glavnog branitelja.